

Na osnovu člana 21. Zakona o mikrokreditnim organizacijama ("Službene novine Federacije BiH", broj 59/06), člana 4. Zakona o Agenciji za bankarstvo Federacije BiH ("Službene novine Federacije BiH", broj 9/96, 27/98, 20/00, 45/00, 58/02, 13/03, 19/03, 47/06 i 59/06) i člana 18. Statuta Agencije za bankarstvo Federacije BiH ("Službene novine Federacije BiH", broj 42/04), Upravni odbor Agencije za bankarstvo Federacije BiH, na sjednici održanoj 14. marta 2007. godine, donosi

ODLUKU

O OSTALIM OPĆIM UVJETIMA ZA POSLOVANJE MIKROKREDITNE ORGANIZACIJE

I. OPĆE ODREDBE

Član 1.

Ovom Odlukom bliže se propisuju ostali opći uvjeti za poslovanje mikrokreditne organizacije (u daljnjem tekstu: MKO) koji nisu propisani ili precizirani zakonom i drugim odlukama Agencije za bankarstvo Federacije BiH (u daljnjem tekstu: FBA).

II. OBAVJEŠTAVANJE

Član 2.

Pored obaveza MKO o izvještavanju FBA propisanih zakonom i drugim odlukama FBA, MKO je obavezna:

- obavijestiti FBA o datumu početka rada MKO, 5 (pet) dana prije početka rada,
- dostaviti rješenje o upisu u Registar emitenata kod Komisije za vrijednosne papire Federacije BiH i Izvod iz Registra vrijednosnih papira u Federaciji BiH, u roku od 15 dana od dana upisa ukoliko je MKO organizirana kao dioničko društvo.

III. POSLOVANJE SA POVEZANIM LICIMA

Član 3.

Odredbe ove Odluke propisuju minimum standarda poslovanja MKO s licima povezanim sa MKO u skladu sa članom 4. Zakona o mikrokreditnim organizacijama ("Službene novine Federacije BiH", broj 59/06), (u daljnjem tekstu: Zakon).

Član 4.

Pod "međusobno povezanim ili zajedničkim investicijama " u smislu člana 4. Zakona, podrazumijeva se odnos dva ili više lica koja imaju zajedno direktno ili indirektno više od 25% vlasništva u kapitalu bilo kojeg pravnog lica, sa ili bez prava glasa, osim u predmetnoj MKO i ako međusobno djeluju u dogovoru sa ciljem da se utiče na donošenje politika i odluka u tom pravnom licu.

Pod "značajnim vlasničkim interesom" u smislu člana 4. Zakona, podrazumijeva se odnos jednog pravnog ili fizičkog lica koje samostalno ili u dogovoru sa jednim ili više drugih pravnih ili fizičkih lica:

- a) posjeduje direktno ili indirektno najmanje 10% vlasništva u kapitalu drugog pravnog lica, ili
- b) ima mogućnost da vrši značajan uticaj na upravu ili politike tog pravnog lica, na osnovu sporazuma ili na bilo koji drugi način.

Član 5.

Mikrokredite povezanim licima ne može davati MKO organizovana kao mikrokreditna fondacija (u daljnjem tekstu: MKF) ili mikrokreditno društvo (u daljnjem tekstu: MKD) iz člana 42. Zakona.

Član 6.

MKO može obavljati poslovne transakcije s licem koje je povezano s MKO samo u skladu sa Zakonom, ovom Odlukom i posebnim politikama MKO za poslovanje sa licima povezanim s MKO (u daljnjem tekstu: Politike), koje na prijedlog uprave/ direktora MKO donosi i prati njihovu primjenu nadzorni/upravni odbor MKO.

Transakcijom sa povezanim licem smatra se i transakcija s trećom stranom ako su sredstva koja su korištena u transakciji prenesena povezanom licu ili su iskorištena radi sticanja koristi povezanog lica.

MKO utvrđuje i vodi popis (registar) povezanih lica.

Nadzorni odbor/upravni MKO odgovoran je za postupanje MKO u skladu sa zakonom i odredbama ove Odluke.

Član 7.

Politike iz člana 6. ove Odluke treba, kao minimum, da uključe i slijedeće uvjete:

1. da MKO može obavljati poslovne transakcije s licem povezanim sa MKO samo uz odobrenje nadzornog/up- ravnog odbora;
2. da lice povezano s MKO koje je član nadzornog/upravnog odbora ne može učestvovati u glasanju prilikom donošenja odluke o poslovnim transakcijama između MKO i njega samog ili bilo kojeg drugog s njim povezanog lica iz odredaba člana 4. Zakona;
3. da informacije za transakcije povezane sa prodajom ili kupovinom aktive (sredstava) i druge transakcije uključuju relevantne informacije i dokaze koji potvrđuju vrijednost te aktive (tih sredstava), njihovu kupoprodajnu cijenu, podobnost i namjeru investitora, itd. Nadzorni/upravni odbor mora dati pismenu izjavu da je bilo koja transakcija, obavljena između MKO i osobe povezane sa tom MKO, fer i u najboljem interesu za MKO;
4. da MKO formira i održava uredne evidencije, dokumen- taciju i dosjee o odobrenjima nadzornog/upravnog odbora iz ovog člana;
5. da svaki član nadzornog/upravnog odbora, odbora za reviziju, uprave/direktora, izvršni direktori MKO treba najkasnije do 31.01. tekuće godine, u pismenoj formi, potvrditi da su mu poznate Politike iz ove odluke i da će se tokom trajanja svog mandata na toj poziciji ponašati u skladu sa istim;
6. da odobrenje nadzornog odbora MKD koje može odobravati mikrokredite povezanim licima (MKO koja nema ograničenja iz člana 5. ove Odluke), mora biti zasnovano na svim relevantnim informacijama, detaljima i uvjetima transakcija za koje se daje, a naročito po pitanjima iznosa kredita, kamatnih stopa, naknada, finansijskih izvještaja zajmoprimca koji dokazuju njegovu sposobnost za urednu otplatu kredita, pitanja kolaterala, i sl.;

Član 8.

Pri obavljanju poslova s licima povezanim sa MKO ne mogu se ponuditi bilo kakvi povoljniji uvjeti u odnosu na druga lica.

Član 9.

MKO je dužna da FBA dostavlja kvartalne izvještaje o svim transakcijama sa licima povezanim s MKO obavljenim u izvještajnom kvartalu, najkasnije 30 dana od zadnjeg dana izvještajnog kvartala.

Član 10.

Ugovori o kreditu koje je MKO, registrovana u skladu sa Zakonom o mikrokreditnim organizacijama ("Službene novine Federacije BiH", broj 24/00), zaključila sa licima povezanim s MKO, koji do dana stupanja na snagu ove

Odluke, nisu u skladu sa uvjetima i kriterijima predviđenim ovom Odlukom, ostaju na snazi bez mogućnosti njihovog produžavanja.

IV. POSLOVANJE SA DONIRANIM SREDSTVIMA

Član 11.

MKF je obavezna voditi evidenciju o doniranim sredstvima i tretirati ih kao donirani kapital o čijem stanju je dužna izvještavati FBA.

MKF koja ima donirani kapital obavezna je s tim doniranim kapitalom poslovati kao savjestan domaćin u skladu s ugovorom o donaciji, zakonom, odlukama FBA i aktima MKF.

Član 12.

Ukoliko ugovorom o dodjeli doniranih sredstava nije drugačije ugovoreno, MKF ne može donirani kapital:

- investirati u svoja stalna sredstva (fiksna aktiva),
- koristiti za pokriće gubitka u poslovanju MKF.

Član 13.

Članovi upravnog odbora i direktor MKF koja ima donirani kapital i članovi nadzornog odbora, direktor i izvršni direktori MKD u kojem ova MKF ima većinsko vlasništvo, trebaju imati iskustvo i kompetentnost u skladu sa Odlukom o uvjetima i postupku za izdavanje dozvole za rad i saglasnosti za sticanje vlasničkog udjela ulaganjem i prijenosom imovine mikrokreditne fondacije (u daljnjem tekstu: Odluka) i ne mogu biti međusobno povezani brakom ili po krvnom srodstvu do trećeg stepena.

Član 14.

Prema MKF koja ima donirani kapital, a utvrdi se da posluje sa gubitkom, ili ima značajnih nepravilnosti i slabosti u radu, FBA može izdati pisani nalog:

- za otklanjanje utvrđene nepravilnosti u određenim rokovima,
- da sačini program za prevladavanje poslovanja sa gubitkom sa težištem na zaštiti doniranog kapitala,
- o privremenoj suspenziji članova organa i/ili zaposlenih u MKF,
- za smanjenje sektorske koncentracije mikrokredita u cilju bolje diverzifikacije rizika,
- za oduzimanje doniranog kapitala i prijenosa na jednu ili više MKF. Prijenos doniranog kapitala na drugu MKO vrši donator uz konsultacije s FBA, a ukoliko ne postoje uvjeti za prijenos od strane donatora, prijenos vrši FBA.

U slučaju oduzimanja i prijenosa doniranog kapitala iz MKO utvrđuje se dio viška prihoda nad rashodima ostvaren po osnovu rada s doniranim kapitalom i isti se oduzima i prenosi zajedno s doniranim kapitalom na drugu/druge MKO.

V. OSTALA OGRANIČENJA I OSTALI UVJETI POSLOVANJA

Član 15.

Ukupni kapital MKO (aktiva minus obaveze minus donirani kapital) mora iznositi najmanje 10% aktive po revidiranom izvještaju.

MKO ne može investirati u stalna sredstva (fiksna aktiva) više od 10% ukupne aktive umanjene za iznos doniranih sredstava.

Dobit iz poslovanja MKD koja pripada MKF, koristi se u svrhu daljeg mikrokreditiranja prema planu koji usvaja upravni odbor MKF.

Plan korištenja sredstava iz stava 3. ovog člana, dostavlja se FBA u roku od 30 dana od dana donošenja odluke o utvrđivanju i raspodjeli dobiti u MKD.

FBA može naložiti izmjenu plana korištenja sredstava dobiti iz stava 2. ovog člana, ukoliko ocijeni da je raspolaganje tim sredstvima nezakonito, nesvrishodno i neracionalno.

Član 16.

MKF je dužna obezbijediti da:

- povrat na aktivu bude prilagođen za inflaciju, tržišnu cijenu kapitala i donacije i mora da bude pozitivan,
- operativna efikasnost poslovanja ne smije biti viša od 45%,
- rizik portfolija preko 30 dana bude manji od 5%,
- otpis bude manji od 3%.

Odredbe iz stava 1. ovog člana primjenjuju se i na MKD u kojem MKF ima većinsko vlasništvo (preko 51% ukupnog vlasništva).

Način izračunavanja prilagođenog povrata na aktivu i operativnu efikasnost poslovanja, propisat će direktor FBA posebnim uputstvom.

Član 17.

MKF može prodavati dio udjela ili dio dionica koje ima u MKD iz člana 42. Zakona, pod uvjetima da:

- upravni odbor MKO donese program prodaje sa obrazloženjem o namjeni sredstava dobijenih prodajom,
- vlasnički udjel MKF u kapitalu MKD iz člana 42. Zakona, ne bude ispod 51%,
- nezavisni revizor prije prodaje izvrši procjenu vrijednosti MKD, i
- se oglas o prodaji i uvjetima prodaje objavi u najmanje jednom dnevnom listu koji izlazi u Federaciji BiH, s tim da rok za prijavu na oglas ne može biti kraći od 30 dana od dana objave.

Član 18.

Vlasnički udjel MKF u kapitalu MKD iz člana 42. Zakona, može biti i manji od 51%, samo u slučaju dokapitalizacije tog MKD od strane drugih pravnih ili fizičkih lica.

Dokapitalizacija iz prethodnog stava mora se vršiti samo novčanim sredstvima i u iznosu od najmanje 1/3 postojećeg kapitala u tom MKD.

Član 19.

Odredbe čl. 5. i 6. Odluke, primjenjuju se na pravna i fizička lica koja stiču značajan vlasnički interes preko 10% u MKD ili ga povećavaju preko 33,3%, 50% ili 67,7%.

Član 20.

Ova Odluka stupa na snagu osmog dana od dana objavljivanja u "Službenim novinama Federacije BiH".

Broj 01-1-393-12/07
14. marta 2007. godine
Sarajevo

Predsjednik Upravnog odbora
mr. **Eldar Arnautović**, s. r.